

Bujagali Hydropower Project (BHPP):

<http://www.bujagali-energy.com>

n'eisundiro ly'amasaanhalaze agagheza megawatt 250 eriri kuzimbibwa aba Bujagali Energy Limited ku mwiga Kiyira okumpi n'ekibuga Idhindha, mu Uganda. Omulimo guno gusasulirwa Industrial Promotions Services (Kenya) Limited n'aba SG Bujagali Holdings Ltd nga bano bakolagana n'ekitongole kya Sithe Global Power, LLC (USA).

Omulimo bwe gwali nga 31 omwezi ogw'eikumi n'ebiri, 2010



Eisundiro ly'amasaanhalaze

Omulimo guno gwatandiika

nga: 26 omwezi ogw'omukaaga.

Gwakitongozebwa: Mu kitundu eky'okusatu 2011.

Okumaliriza okuzimba

eisundiro: Mwezi gw'akuna 2012

Ebikoleibwaku:

- **Eby'ekikugu:** Ebitundu 99.7 ku 100 oba 99.7%.
- **Okugula ebyetaagisa:** Ebitundu 99.5 ku 100 oba 99.5%.
- **Okuzimba:** Ebitundu 58 ku 100 oba 58%.

OKUTUUKIRIZA ENTEGEKA EDHIGEMA KU MBEERA Y'ABANTU N'OBUTONDE (SEAPS)

Okutuukiriza ebintu eby'asengekebwa mu ntegeka edhigema ku mbeera y'abantu n'obutonde kwagya mu maiso mu kitundu eky'okuna (okuva omwezi ogw'eikumi okutuuka mu mwezi ogw'eikumi n'ebiri), 2010. Bujagali Energy Limited (BEL) ekoze omulimo gw'amaani ku kuzimba eisundiro ly'amasaanhalaze agagheza megawatt 250.

Emirimo emikulu egikoleibwa mu kiseera kino n'omuli okunoonereza ku mbeera n'enfuna y'abantu okumanha oba abantu baganhulwa mu nkola BEL dhe yainhama mu byalo ebikoseibwa pologyekiti, okusitula ku mbeera dh'abantu, okulondoola ebibira n'ebisolo n'okumaliriza ebifo ebisuubulirwamu n'ebindi kamaala.

Embaluwa ey'amakobo eno eyogera ku nkulankulana ebairwo mu mbeera n'enkolagana n'abataka, okukuuma obutonde n'emirimo egy'akolebwa okuva mu mwezi ogw'eikumi okutuuka mu mwezi ogw'eikumi n'ebiri, 2010.

Embaluwa eno eriwo mu Luganda ni mu Luzungu.

Nhumirwa Okugisoma

Nampiira 2011

Obweyamo bwa BEL

BEL yeyama okulongoosa ebintu ebikozesebwa abantu nga omwo n'omuli okulongoosa ensaasaania y'amaadhi, eby'endhegeresa, eby'obulamu n'okughanirira eby'enkulankulana, nga ebindi ku biri mu pulogulaamu ey'okukulankulania ebyalo (CDAP).

BEL eri n'enkola edhiziyiza okukosa ebifo omuba ebisolo n'ebiwuka, amaadhi ag'omwitaka ni kwitaka, eby'enhandha, eby'okuvuba n'ebyo ebisuubirwa okugwawo nga tibiraze, okugeza nga ensonga y'abantu ebeeyuwa mu kifo ghe bali kuzimba eisundiro ly'amasaanhalaze nga banoonia emirimo, ebibwuka ebireeta endwaire, n'eby'obulambuuzi, nga bino biri mu pulogulaamu ey'okulondoola n'okukuuma obutonde (EMMP).

Eby'endhegeresa

Abakulembeze mu Klezia ey'e Naminya baagha ekizimbe eky'ebibiina 10 omukisa era abaana basomera mu bibiina.



Ekizimbe eky'ebibiina 10 ekyazimbibwa ku Naminya Primary School

Pulogulaamu ey'okuyamba abali obubi

Emitendera egy'okufuna omukugu oba ekitongole ekinaafuyira amaka agali obubi 350 okutangira ebiwuuka n'endwaire dhe bireeta kwawa mu kitundu kino eky'omwaka. Okufuyira kusuubirwa okutandiika mu mwezi ogusooka mu mwaka 2011.

Amaadhi

Okutaawo emidumo egy'amaadhi kuli kugya mu maiso. Ku nkomerero ey'ekitundu eky'omwaka kino bali bankataawo emidumo egigheza obughanvu bwa kilometer 17 ku kilometer 37. Abataka baalonda ebifo eby'okutaamu obufuleedhe buyambeku abo abataidha kusobola kutuusa midumo gy'amaadhi mu maka gaibwe. Aye era boona baidha kusasulanga ku akasente katono.

Okuzimba eisundiro ely'etaagisa okusunda amaadhi okugya e Naminya kwatandiika mu mwezi ogweikumi n'ebiri.



Okutaawo emidumo gy'amaadhi e Budondo

Okukulankulania eby'amatano Okwewola n'okuwola empiiya

Empiia edh'okuwola abantu abakoseibwa pogyekiti dhitandiise okwira n'okuzaala amagoba.

Mu kitundu eky'okubiri mu 2010 BEL yategeragana ni Uganda Finance Trust, yaagigha empiiya edighera obukaire 12,000,000 ewole abo abakoseibwa

pogyekiti (PAPs). Buti, abantu 384 mu byalo ebikoseibwa pogyekiti bankafuna empiiya edhighera obukaire 238,470,000 era amagoba gaali obukaire 6,470,000 mu kutundu eky'okuna, 2010.



Abantu abaakoseibwa pogyekiti nga basomesewa ku nkola ey'okuwola empiiya.

Eby'obulimi

Pulogulaamu ey'okughanirira eby'obulimi yawa mu kitundu kino eky'omwaka. Abalimi 1,064 okuva mu byalo ebikoseibwa pogyekiti beenigira mu pulogulaamu. Pulogulaamu yaganhulwa abantu abaakoseibwa pogyekiti abagheza ebitundu 75 ku 100 kwabo abeenigiire mu by'obulimi. Abalimi baatendekebwa mu ngeri ey'okutambuzaamu ebikunsu oluvainhuma baagundhawa ebikunsu ebyabalimi 83 okuyambaku okusomesa abandi ku nima ey'omulembe n'okunoonia akatale. Amaka 34 agaasengulwa nigatwalwa e Naminya goona gaayambibwaku. Abalimi baafuna okughabulwa ku by'okulima n'okwaya, n'ebikozesebwa mu kulima n'okwaaya bya myaka esatu (2008 – 2010).

Abantu abakoseibwa pogyekiti baakoberwa ku kukendeeza ku pulogulaamu edh'okubayamba. Bino byali mu nkiiko edhaliwo okubamanhisaaku ebiyaka mu

pogyekiti mu kitundu kino eky'omwaka.

Abakulembeze ba disitulikiti ey'eIdhindha, Mukono ni Buikwe baakubirizibwa okugya mu maiso ni pulogulaamu dhino edh'atandikibwa BEL. Aye BEL eidha kugya mu maiso ni pulogulaamu ey'okulondoola eby'obulimi.

Eby'obulamu mu byalo ni pulogulaamu ya Siriimu

Ebikunsu bye by'obulamu mu byalo byagya mu maiso n'okukubiriza eby'obulamu nga bagaba kondomu, n'obulezi bw'omusuudha, n'okukubiriza abataka okwenigira mu misomo egy'eby'obulamu.

Omukungu mu by'okuzimba yaleeta alipoota eraga embalirira ey'okwidhabiriza Budondo Health Centre IV. Ghaaliwo olukiiko n'abeebuuzibwaku, aghalala n'abakulembeze mu Budondo okwekeenenia lipoota n'okulondamu ebirisookerwaku. Omukugu mu by'okuzimba yawaayo alipoota esembayo mu mwezi ogw'eikumi. Bali kwekeenenia ebaluwa edhisaba kontulakita ey'okulongoosa eirwaliro era kino kisuubirwa okuwa mu mwezi ogusooka mu 2011.

Ebifo ebikolerwamu eby'obusuubuzi

Ab'eigoloza lye Wakisi baapangisa omuntu okukolera mu kifo ekikolerwamu eby'obusuubuzi BEL kyeyaidhabiriza yataamu n'ebikozesebwa. Buti emirimo giga mu maiso bukalamu.

Okukozesa ekifo eky'eby'obusuubuzi eky'e Budondo kwalwawo kuba amasaanhalaze gaalwa okutuukayo, waire gamala gaatuukayo mu mwezi

ogw'eikumi n'ebiri, 2010. Era ekifo kino kiidha kukozezebwa bukalamu mu mwezi ogusooka, 2011.

Okutendeka abaisuka mu mirimo egy'emikono

Abasomi 72 ku 140 BEL beesasulira eby'etaago bankatendekebwa ku Nile Vocational Institute era basuubirwa okumaliriza emisomo gyaibwe ku nkomerero y'ekitundu eky'okubiri, mu mwaka 2011. Ebitundu 20 ku 100 (20%) ku baisuka 68 abaatendekebwa baafuna emirimo.



Abandi ku baisuka abaatikirwa ku Nile Vocational Institute (NVI)

Akatala

Abantu abakoseibwa pologyekiti baaghebwa akatala mu mwezi ogw'eikumi n'ebiri 2010, nga babita mu bakulembeze be Igalozza lye Wakisi ni Budondo. Endagaano eraga obuvunaanizibwa bwa BEL n'amagoloza ago yateebwaku ekinkumu era baataawo n'akakiiko akaidha okuyambaku okulabirira akatala.



Akatala akayaka e Malindi

Okutendeka Ab'ekyalo (CBT)

BEL yafuna ensegeka okuva mu matendekero n'abantu edh'okutendeka abataka b'ebyallo ebikoseibwa eisundiro ly'amasaanhalaze. Bali kwekeneenia ensengeka dhino era okutendeka kusuubirwa okutandiika mu kitundu ekisooka mu mwaka 2011.

Okulondoola pulogulaamu ey'okwiza obuyaaka embeera y'abantu.

Okunoonereza ku mbeera n'enfuna y'abantu bwe byemereire kwakolebwa. Lipoota eri kughandiikibwa era eidha kuwa mu mwezi ogusooka mu mwaka 2011.

Okubunia amasaanhalaze mu byalo

Mu kitundu eky'omwaka kino ghaaliwo okuteesa n'ekitongole ekibunia amasaanhalaze (UMEME) ku ngeri ey'okubuniamu amasaanhalaze mu byalo ebikoseibwa pologyekiti. BEL eidha kutandiika okukola ku nsonga eno oluvainhuma lw'okufuna lipoota ya UMEME. BEL y'asaba ab'obuyinza ku kubunia amasaanhalaze mu byalo okugiyambaku n'empiiya edh'okubunisa amasaanhalaze mu kifo ekirimu pologyekiti. Pulogulaamu eno ya kuganhulwa amaka 600. Abatwala eby'okubunisa amasaanhalaze bakaali kwanukula kusaba.

Okwebuuzza ku bantu n'okubamanisaaku ebiyaka kwali bino:

BEL yagya mu maiso n'okuteesa n'abo boona boona bekigemaku n'okukola ku kwemuluguunia okubairewo mu kiseera kya pologyekiti kino.

Enkiiko dh'abo bekigemaku mu byalo ni mu gavumenti dhaaliwo okubamanhisaaku okuzimba ghe kutuuse, okukyusa omwiga n'olusito, n'okukulankulania ekyalo ghe bituuse. Abo bekigemaku, okusingira irala abakoseibwa pologyekiti baasiima inho BEL by'ebakoleire, era baidhukiza BEL ebyo by'eyeyama aye nga ekaali kubituukiriza, okugeza nga okwongerayo amasaanhalaze mu byalo, okutendeka abataka, okwongeraku ebikozesebwa mu by'okulima n'ekyasalibwawo ku kukosebwa okuva mu kubwatusa amabaale.

Ghaaliwo olukiiko n'abataka okuteesa ku kukosebwa okuva mu kubwatusa amabaale ku nsalo ey'obuvandhuba bw'omwiga.

Okunoonereza okukakasa okwemulugunhia ku kukosebwa okuva mu kubwatula mabaale kwakolebwa. Ghaaliwo olukiiko n'abakulembeze ba disitulikiti ey'e Idhindha, ow'eb'okwerinda mu disitulikiti ey'e Idhindha, akulira ba mbega mu kiketezo kino n'omukwenda wa pulezidenti okubakoberaku pologyekiti ghetuuse n'okwemulugunhia kw'abantu ku kukosebwa okuva mu kubwatusa amabaale.

Okuteesa okundi kwaliwo n'obwa Kyabazinga bwa Busoga ku nsonga ey'okumaliriza endagaano ey'okusengula emisambwa, n'okwanukula ebiuuzo bya BEL n'obwa Kyabazinga. Baikirizigania era baata kundagaano ekinkumu.

Okwebuuzza ku bataka n'okukola ku nsonga dh'abantu kwaliwo emirundi ebiri buli saasira.

Abakulembeze baasima pulogulaamu edh'ankakolebwaku baasaba n'edhisigaireyo nga okubunia amasaanhalaze n'amaadhi dhoona dhikolebweku mangu.

Ghaaliwo okwebuuzza ku bakulembeze ba disitulikiti ey'e Idhindha, n'atwala eby'okwerinda mu disitulikiti eno, n'akulira ba mbega mu kiketezo kino n'okubakobera ku pologyekiti ghe tuuse, n'okwiba ebintu okugiire mu maiso. Enkiiko edhindhi n'aba EPC / yoti dhiidha kubaawo.

Okusimba emiti ku nsalo edh'omwiga n'okutangira mukoka

Pulogulaamu edh'okusimba emiti ku nsalo edh'omwiga n'okutangira mukoka dhaawa. Hectares edhiswika mu 400 ghagati wa Bujagali Hydropower Project (BH,PP) n'ekiyiriro Kalagala mu maserengeta g'omwiga dh'asimbibwamu emiti egitali gya nsambo ndala.



Egindi ku miti egy'asimbibwa

Pulogulaamu ey'okuvuba mu byalo

Ekidiba eky'eby'enhandha eky'okubiri kyawa okusimbibwa ku kyalo Naminya Resettlement kyateebwamu emale ni Tilapia mu kitundu kino eky'omwaka. Ghagati gh'omwezi ogw'okusatu n'ogw'okutaanu 2011, eby'enhandha bino biriba

bituuse okutundibwa n'okuliibwa.

Pulogulaamu eno yasasulirwa BEL ni SOUL, ekitongole ekya nakyewa. Ekidiba eky'okusatu kigya kusimbibwa. Era BEL ni SOUL bali kulowooza okusima ebidiba mu byalo ebindi.



Ghaigulu, Ebidiba by'e by'enhandha e Naminya

Okuzimba omwalo gwasigala kwidaala elya yogerwaku mu kitundu ekyo ekyabita (mwezi gwa musanvu kutuuka mu mwezi gwa mwenda, 2010).

Okulondoola obutonde

Okulondoola obutonde ku bizinga ebiri mu mambuka g'omwiga kwatandiika mu kitundu eky'omwaka kino era kwidha kweyongerayo okumala omwaka mulamba.

Ghansi, Ekikunsu ekilondoola obutonde nga kyetegekera okulondoola



Eby'obulambuuzi

Okukubagania ebidhuubo n'ekitongole ekindi eky'eby'obulambuuzi, kyebeeta Raft Supreme okubona oba kisoboka okukighaniriraku

okutaawo eby'obulambuuzi ebindi ku Isundiro eriri mu mambuka ag'omwiga.

Oluvainhuma lw'okuta ekinkumu ku ndagaano ya BEL ni Kampuni gye beeta Adrift Adventure mu mwezi ogw'okuna 2010, okugula eryato eryetebwa 'The African Queen' kwawa era n'okuliidhabiriza kwona kwidha kuwa mu mwezi ogw'eikumi n'ebiri 2010. Liidha kutandiika okukola mu mwezi ogusooka mu 2011. Eryato lidha kuvugibwanga buli lwa igulo ku mwigwa Kiyira.

Mu nkola ey'okusimba emiti ku bizinga BEL gye yakola ni Adrift (U) Limited, hectare 30 edh'emiti dh'asimbibwa okuva mu mwezi ogw'omunaana okutuuka mu gw'eikumi n'ebiri dhaidhabirizibwa ku kizinga Itanda era okwidhabiriza kwidha kugya mu maiso okutuuka mu mwezi ogw'okubiri 2011.

Ghaaliwo entegeka edhindhi edh'okusimba emiti hectare 26 ku bizinga ebindi 5 ebiri mu maserengeta g'omwiga okulikuzimbibwa eisundiro ly'amasaanhalaze.



Ow'akakiiko keebifo ebibaamu ebisolo n'ebiwuuka nga alondoola emiti egy'asimbibwa ku bizinga

Obutonde, Eby'obulamu n'okwekuuma

Enkuuma y'ebikyafu mu kifo ghebali kuzimba eisundiro ly'amasaanhalaze

Mu kitundu kino eky'omwaka ebikyafu eby'obulabe n'ebitali by'abulabe byagya nga byeyongera okuva ghe bali kuzimba eisundiro ly'amasaanhalaze ni kumbali. Ebikyafu eby'obulabe okugeza nga Oiro, n'ebibaatule bisolozebwa ebitongole eby'afuna olukusa okuva mu kitongole ekivunaanibwa ku butonde (NEMA). Ebikyafu ebitali bya bulabe bitwalibwa mu kiina eky'ebikyafu e Idhindha. Ebyuma ebikutwike kutwike biizibwayo mu ikolero ate ebibaawo by'ebasazeeku bigabirwa abo abakosibwa pologyekiti.



Ghebasolokeza ebikyafu eby'obulabe nga bikaali kutolebwa ghe bali kuzimba eisundiro ly'amasaanhalaze

Abageni

Ebitongole n'ebikunsu bino by'akyala ghebali kuzimba eisundiro ly'amasaanhalaze mu kitundu eky'okuna kino.

- Ekikunsu ky'abantu abakolagana ni BEL, IPS/Agakhan.
- KFW n'ekikunsu okuva mu IPS/Agakhan.
- Omukwenda wa gavumenti ya Bufalansa ni bakozi baine baakyala ghebali kuzimba eisundiro ly'a masaanhalaze okubona omulimo ghegutuuse, pulogulaamu edh'okuyambaku abantu,

eby'obutonde, okusingira irala okusimba emiti ku nsalo edh'omwiga n'okubunia amaadhi ag'emidumo.

- Abakungu okuva mu kitongole ekipima abungi bw'amasaanhalaze (ERA) baakyala mu kifo ghebali kuzimba daamu okwekeeneenia ku kwemulugunhia ku kukosebwa okuva mu kubwatusa amabaale.
- Minisita n'abakungu okuva mu gavumenti ya Misili (Egypt) aghalala ni Minisita atwala eby'amasaanhalaze mu Uganda boona baakyala.
- Aba Lenders boona baakyalira daamu gy'ebali kuzimba, baalondoola pulogulaamu egema ku mbeera y'abantu n'obutonde era beekobaanamu n'abantu abakoseibwa pologyekiti n'abo abakola emirimo egireeta empiiya.
- Ekitongole ekibunia amasaanhalaze (UMEME) n'abakungu okuva mu Common Wealth Development Corporation (CDC) boona baakyala.
- Ab'akakiiko ke kitongole kyebeeta Inter Aid Uganda nga kino kiwa budhulizi ku mulimo oguli kukolebwa.
- E kikunsu okuva mu mawanga agakulukutiramu omwiga Kiyira.

Tudhuuba tuti wanhumirwa okusoma ; linda eiraku.

Yaghandiikibwa bakozi ba BEL